

An u axi thuchanchat a Filemón c'al an t'ocat abathuale Pablo

A Pablo in thuchanchal an u a Filemón

¹Nana'its im Pablo in c'uajat ti al an huic'axte' cum in xe'tsinenec cu olna' an alhua' cau tin cuenta a Cristo Jesús. Nana' ani c'al u ebchal c'al a Cristo Timoteo tu tsapnethal, Filemón. Nan tu thuchanchal axe' xi u cum tu c'anithal ani pel tu at le'nath juntal t'ojnal c'al a Cristo. ²Ca tsapnetha' an ebchalablom ax u tamcunal ta q'uima' ani jaye i ebchalchic Apia ani a Arquipo. Ja'its xe' a Arquipo ax tu tolminchamal huahua' tin cuenta an alhua' cau ejtil max pel tu at soldado c'al a Cristo. ³U lej le' abal i Tata Dios ani i Ajatic Jesucristo ti lubach co'onchi a ichich c'al in alhua' inictal ani ti jun ejetbethanchi a ichich.

C'anithom ani belom a Filemón

⁴Ets'ey tam cu t'ila' abal it lej belom u binal i c'ac'namal yan c'al a Dios. ⁵In olchinenequits abal a lej c'anithal an Ajatic Jesús ani a lej belal. Jaye a c'anithal im bichohuil a Dios. ⁶Cum a cua'al an t'ilomtalab c'al an ebchalabchic tin

cuenta abal a junax belal an Ajatic, jaxtam c'al nixe' xi t'ilomtalab quit más junax tso'oblinchat c'al patal an lablinchixtalab ax i junax cua'al c'al a Cristo Jesús. ⁷Cum pel it at ebchalab c'al a Cristo ani it lej c'anithom c'al am belomchic, jaxtam tu culbethanchab in ichich jaja'chic. Nana'ne in lubachmethanchab u ichich ani in lej culbel c'al a c'anithomtal.

A Pablo in conchinchal i alhua'talab a Onésimo

⁸Cum nan pel tin abathualejil a Cristo u ejtohualac tu lej uchbiy c'al i cau Filemón, tocat yab ne'ets cu t'aja'. ⁹Expith ne'ets tu pacabethach ucha' i cau cum it lej c'anithom. Nana' im Pablo in yejtselits in c'uajat al an huic'axte' cum in xe'tsinenec cu olna' an alhua' cau tin cuenta a Cristo Jesús. ¹⁰Tiquin t'ajchi an alhua'talab ca yajnanchi a Onésimo axi teje' c'uajat al an huic'axte' c'al nana'. U tolminchi quim bela' a Cristo, ani jaxtam u tsu'tal ejtil max pel tu tsacamil.

¹¹Ti jayq'ui' a Onésimo pel a t'ayat t'ojnalil, ani yab lej tabat ti tolminchi. Xohue' más lej tabat

ne'ets ti tolminchi jant'ini' tin tolminchits nana'. ¹²Ne'ets cu aba' ca huichiy junil c'al tata', ani u le' max ca bats'u ejtil max nana'its axi ne'ets tiquim bats'u. ¹³U lej le'ac max ca jilc'one abal tiquin tolminchiye teje' al an huic'axte' tin cuenta an alhua' cau ejtil max tata'its ax tin tolminchalac. ¹⁴U tsalpay hualam yab pel a culbetal abal jaja' ca jilc'one, ani yab ne'ets quin c'uajiy culbel max tata' yab tin jilchal c'al a culbetal. ¹⁵Hualam max a Dios in jila' a Onésimo ca pit'c'on yab ca c'uajiy c'al tata' hue' ohuat, ani xo' ne'ets ca huichiy ca ets'ey c'uajiy c'al tata'. ¹⁶Xo' ca bats'u ti ebchalab c'al a Cristo lej c'an, yab ejtil ti jayq'ui' expith pel a t'ojnalil. Nan u lej c'anithal xe', ani in tomnal tata' ca c'athpich c'anitha' cum xo' pel a ebchal c'al an Ajatic ani yab expith pel a at inic.

¹⁷Max tata' chubax tin tsu'tal pel tin ja'ub c'al tata', tam tiquim bats'unchi a Onésimo ejtil max nana' tim bats'uhual. ¹⁸Max jaja' ti othchi jant'oquits'ui a c'al ani max ti nenchale, nan ne'ets tu jalbinchi. ¹⁹Nana' im Pablo ani c'al axe' u cuete' thuchbil u lej punuhual tu ba' abal lej chubax ne'ets tu jalbinchi. Yab ca uc'chiy abal pel

a uchbil tiquin tolmiy, cum nan tu lej tolminchamalits c'al a ejattal. ²⁰Ebchal, cum it belom c'al an Ajatic tiquin t'ajchi an alhua'talab ca bats'u a Onésimo. Tam ojni' ne'ets quin lej culbe cum pel huahua' tu at ebchalab c'al a Cristo.

²¹Nan tu thuchanchal axe' xi u cum u lej belal tu ichich abal ne'ets tiquin lej t'ajchi an alhua'talab jahua' nan tu conchi. Ma u tso'obits abal ne'ets tiquin más t'ajchiye.

²²Tiquin t'ojonchi jun ti quin coyots tam quin ulits c'al tata'. U lej le' max a Dios tiquim pitha' an q'uij abal quin c'ale tu tsa'biy jant'ini' tata'chic tin conchinchal i alhua'talab c'al a Dios abal cu ejtjou quin c'ale.

An tsapnethomtalab

²³Ti abchal i tsapnethomtalab a Epafras axi teje' c'uajat al an huic'axte' c'al nana'. In t'ojonchal a Cristo Jesús ejtil nana'. ²⁴Ti abchal i tsapnethomtalab jaye a Marcos ani a Aristarco ani a Demas ani a Lucas. Tin lej tolminchal jaja'chic c'al in t'ojlabil an Ajatic.

²⁵U lej le' abal i Ajatic Jesucristo ti lubach co'onchi a ichich c'al in alhua' inictal. Amén.